



UNIVERSITÄTS-
BIBLIOTHEK
PADERBORN

Universitätsbibliothek Paderborn

Fasti Mariani Cum Divorvm Elogiis In Singvlos Anni Dies Distribvtis

**Brunner, Andreas
Pfeffer, Wilhelm**

Antverpiæ, 1637

S. Joannes Conf. 10. Octobris.

urn:nbn:de:hbz:466:1-44055

phani vultu feliciter THEOPHILVM Angelus bonus fallens ad mundi contemptum illis verbis pellexit: *Tolle crucem tuam, & sequere me.* Et hodie ad eundem invitare hominem homini non licebit? non licebit Angelum æmulari? Jam non ignavus THEOPHILVS, etiam inconsultis parentibus, ad Stephanum, inde ad monachos abiit. Atqui nostro ævo (ô tempora!) facinus est culeo dignum, parentes tam pie fallere, & facere quod laudata toties olim antiquitas, quod ipse puer CHRISTVS fecit. Huc itaque, eia! iterum oculos, hoc in speculo (THEOPHILO nostro) maculas vestras & filii & parentes corrigite. Correxere certè THEOPHILI parentes, & rectius sapere edocti, quò mundum fugienti alas adderent, ipsi cœnobium filio struxerunt; factumque hoc cælum probavit, cum suâ voce filium illuc evocavit. Inde vi extractus, multa que sub sacrarum imaginum hoste Leone passus, sed ad extremum dimissus, nil magis doluit, quàm ereptam sibi, quam manu jam jam prehenderat, martyrii palmam: quamquam neque hanc illi negasse Superos existimo. Magnum enim longumque oppidò martyrium est, mundo mori. *Ex Menais.*

Reduc ad animum prosperitates temporum, multitudinem hominum, dignitatum pompas, divitiarum abundantiam. Attende hæc omnia, ubi vel quid facta sunt: & ex hoc pensa, quòd nulla sint, & quia qui ista diligit, somnium vigilans videt. S. Greg. 1. 7. Regist.

S. JOANNES CONF. 10. Octobris.

IOANNIS inter literas etiamnum in Academia Oxoniensi agentis animum si inspexisses, templum musarum, sed multò magis virtutum dixisses.

ses: ita utrasque pulcherrimo connubio in pectore suo sociavit. Ne verò cum scientiis suis in carne & sanguine volutaretur, anno ætatis vigesimo D. Augustini institutum amplexatus est in Bridlingtoniensi cœnobio, in quo cum omnibus se postponeret, omnibus denique præpositus est, factumque hoc tam lubentibus aliis, quam uno ipso invito. Tam modestè tamen imperium usurpavit, uti aperta unius è suis convitia non nisi silentio refelleret, monitusque ut læsam auctoritatem vindicaret, præstare diceret, iratis flammis demere quàm addere oleum. Triclinium illi cum aliis idem, eadem mensa; in mensâ tamen major abstinentia fuit. Amoris divini æstu tam ardebat, ut, cum sacrificaret, vestes, quibus hieme alii se contra frigus armabant, ille tunc poneret, & flammam pectoris loqueretur frequens multusque vapor è capite palam assurgens. Ipse corpore præsens ad aram, animo intereà cælum obambulabat, incendio ita paulatim crescente, ut oculi lacrimis non jam flere, sed toti liquefcere viderentur. Denique ne dubites JOANNEM in cælum evolasse, noveris ante mortem hunc virgini è Vestalibus uni formâ aquilæ visum esse, quæ nubes transcendens illa è schedâ, quam rostro ferebat, verba loquebatur: *Amor meus JESVS*. Evolare ad cælos etiam tu cupis? ab hoc amore alas mutuare, non illo qui humi repit. *Ex Surio.*

Quid tibi cum carne & sanguine, qui divinam in te gestus imaginem? quid tibi cum mundo & vitiis, qui ad hoc conditus esse probaris, ut cælum conscendas, atque cum angelicis spiritibus beatâ Dei visione fruaris? S. Laur. Justin. de Cont. mundi, c. 21.